

## Odbojkaši Slobode u nedjelju igraju protiv sarajevske Bosne u polufinalu play-offa Superlige FBiH



Odbojkaši Slobode u nedjelju u Mejdanu dočekuju ekipu sarajevske Bosne, u polufinalu play-offa za prvaka Superlige Federacije BiH.



Drugi put sa "studentima" u polufinalu play-offa: trener Zahirović s odbojkašima Slobode (Foto: Miro Petrović)

Tuzlaci su se u grupi Sjever plasirali iza Gradine Herceg, dok je Bosna pobjednik prvog dijela takmičenja u grupi Jug. U drugom polufinalu igrat će ekipe Ilijaša i Gradine Herceg. Pobjednici polufinalnih susreta naći će se u finalu kada će odlučivati o prvaku i novom članu Premijer lige BiH.

Zanimljivo je da su se Sloboda i Bosna i prošle sezone našli u polufinalu. Obje ekipe na svom terenu su pobijedile 3:0, a sarajevski tim ušao je u finale zahvaljujući većem broju osvojenih poena.

S kakvim nadama i željama ekipa Slobode dočekuje "studente"?

– Kao i prošle godine, u polufinalu play offa igramo protiv sarajevske Bosne, prvoplasirane ekipe grupe Jug. Za razliku od prošle sezone, ekipa im je jača za Sanjina Bezdoba koji je u ovom trenutku možda i najbolji igrač ove lige – kaže trener Slobode, Nihad Zahirović.

Naravno, bez obzira na brojne probleme s kojima se "crveno-crni" suočavaju, priželjkuju pobjedu.

-Nadam se da će, prije svega, svi igrači biti na raspolaganju, obzirom da neki imaju obaveza na poslu. Drugo, želim da nas posluži zdravlje i da do utakmice, a i poslije, ne bude povreda – zaključio je Zahirović u razgovoru za Tuzla LIVE.

Odbojkašima je podrška iz publike nasušna potreba, pa pozivaju sve ljubitelje sporta u malu salu Mejdana, da naprave atmosferu u kojoj će domaćim odbojkašima kao "vjetar u leđa" pomoći da ostvare što bolji rezultat pred uzvrat u Sarajevu.

Utakmica Sloboda – Bosna igra se u nedjelju od 18 sati. (mp)

Date: 22-03-2019